

Morning Dogri (NSD) National News Bulletin 04-10-2024

आकाशवाणी

खबरां पूनम डोगरा कोला।

1. केन्द्री मंत्रिमंडल नै मराठी, पाली, प्राकृत, असामी ते बंगाली भाषाएं गी शास्त्री भाषा दा दर्जा देने दी मंजूरी देई दित्ती ऐ।
2. केन्द्री मंत्रिमंडल नै 11 लख 72 जहार शा मते रेलवे कर्मचारिं लेई 78एं दिनें दे उत्पादकता कन्नै सरबंधत बोनस गी मंजूरी दित्ती ऐ।
3. केन्द्री मंत्रिमंडल नै 63 जहार 246 करोड़ रपे दे चेन्नई मेट्रो दे दुए गेड़ गी बी मंजूरी देई दित्ती ऐ, जेह्दे कन्नै शैहरी नेटवर्क दा विकास होर 119 किलोमीटर तगर होई जाग।
4. प्रधानमंत्री नरेन्द्र मोदी होर अज्ज कौटिलय आर्थिक सम्मेलन गी संबोधत करगंन।
5. कल होने आले 90 मैंबरी हरियाणा विधानसभा दे चुनां लेई सब्बै तैआरियां मुकम्मल करी लैती गेइयां न।
6. भारत, नेपाल ते बंगलादेश नै भारतदे पॉवर ग्रिड दे राएं नेपाल थमां बंगलादेश गी 40 मैगावाट बिजली निर्यात करने लेई त्रै-पक्खें आले समझौते पर दस्तखत कीते न।
7. महिलाएं दे टी-20 क्रिकेट विश्वकप च भारत अपने अभियान दी शुरुआत अज्ज संजा दुबई च न्यूजीलैंड खलाफ मैच कन्नै करोग।

<><><><><><>

Cabinet Language

केन्द्रीय मंत्रिमंडल नै मराठी पाली प्राकृता असमिया ते बंगाली भाषाएं गी शास्त्रीय भाषा दा दर्जा देने गी मंजूरी देई दित्ती ऐ। शास्त्रीय भाषा भारत दी ऐतिहासक सांस्कृतिक विरासत दे संरक्षण दे रूपै च कम्म करदियां न, जेड़ियां हर इक समुदाय दे ऐतिहासक ते सांस्कृतिक महत्व गी दर्शादियां न। महाराष्ट्र दे मुखमंत्री एकनाथ शिंदे होरें मराठी भाषा गी शास्त्रीय भाषा दा दर्जा देने दे केन्द्रीय मंत्रिमंडल दे फैसले उप्पर खुशी जाहर कीती ऐ।



Cabinet Bonus

केन्द्री मंत्रिमंडल नै 11 लक्ख 72 जहार शा मती रेलवे कर्मचारिएं लेई 78एं दिनें दे उत्पादकता कन्नै सरबंधत बोनस गी मंजूरी देई दित्ती ऐ। बोनस पर 2 जहार 39 करोड़ रपे खर्च होंगन। सूचना ते प्रसारण मंत्री अश्विनी वैष्णव होरें कल नमीं दिलली च दस्सेआ जे उत्पादकता कन्नै जुड़े दे बोनस दा भुगतान रेलवे कर्मचारिएं गी रेलवे दे प्रदर्शन च सुधार दी दिशा च कम्म करने लेई प्रेरित करने लेई इक प्रोत्साहन ऐ। योग्य रेलवे कर्मचारिएं गी बोनस दा भुगतान हर ब'रे दशैहरे थमां पैहले कीता जंदा ऐ। इस ब'रे बी तकरीबन 11 लक्ख 72 जहार नॉन-मैजटेडट कर्मचारिएं गी बोनस दा भुगतान कीता जा करदा ऐ।



Cabinet Energy

केन्द्री मंत्रिमंडल नै भारत गी अंतराश्ट्रीय ऊर्जा दक्षता केन्द्र च शामिल होने लेई कनूनी समझौते शा पैहले लिखित दस्तावेज उप्पर दस्तखत करने दी मंजूरी देई दित्ती ऐ। एह इक वैश्विक मंच ऐ जेहड़ा दुनिया भर च सैहयोग ते ऊर्जा दक्षता गी बढ़ावा देने लेई समर्पित ऐ। एहदे च भारत दी हिस्सेदारी कन्नै कार्बन दे बड़े घट्ट उत्सर्जन आली अर्थबवस्था च तब्दीली आन्नने ते गैस उत्सर्जन गी घट्ट करने दे जतनें दे स्हाबै टिकाऊ विकास प्रति भारत दी वचनबता गी मजबूती थहोग। केन्द्री सूचना ते प्रसारण मंत्री अश्विनी वैष्णव होरें मीडिया कन्नै गल्लबात च गलाया जे इस फैसेने कन्नै भारत गी रणनीतिक ऊर्जा दे तरीके ते नमें हलें गी सांझा करने आली प्रमुख 16 मुख्खे दे समूह तगर पुज्जत हासल करने च मदाद थहोग।



Chennai Metro

केन्द्री मंत्रिमंडल नै चेन्नई मेट्रो रेल दे दुए गेड़ गी मंजूरी देई दित्ती ऐ। त्रै गलियारे आली मंजूर कीती गेदी लाईनें दी कुल दूरी तकरीबन 119 किलोमीटर होग ते एहदे च 128 स्टेशन होंगन। परियोजना गी पूरा करने च 63 जहार 246 किलोमीटर दी लागत औग। इसी ब'रे 2027 तगर सबूरा कीता जाग। इस गेड़ दे पूरा होने पर चेन्नई शैहरा च कुल 173 किलोमीटर दा मेट्रो रेल नेटवर्क तैआर होग। केन्द्री सूचना ते प्रसारण मंत्री अश्विनी वैष्णव

होरें कल नमीं दिल्ली च दस्सेआ जे चेन्नई मैट्रो रेल परियोजना दा दुआ गेड शैहरा दे बुनियादी ढांचे दे विकास च इक महत्वपूर्ण प्रगति ऐ। उनें गलाया जे एह गलियारे चेन्नई गी उत्तर थमां दक्खन ते पूर्व कन्ने पच्छम गी जोडगंन।

<><><><><><>

PM-Kautilya

प्रधानमंत्री नरेन्द्र मोदी होर अज्ज थमां नमीं दिल्ली च कौटिलय आर्थिक सम्मेलन गी संबोधत करगंन। अज्ज थमां आयोजत होआ'रदा एह सम्मेलन 6 अक्टूबर तगर चलोग ते एह कौटिलय सम्मेलन दी त्रीआ संस्करण होग। इस ब'रे दे सम्मेलन च हरित परिवर्तन दे वित्तपोषण भू-आर्थिक चिखंडन ते विकास जनेह विशे उप्पर केन्द्रित होग। भारतीय ते अंतराष्ट्रीय विदवान ते नीति निर्माता भारतीय अर्थबवस्था ते वैश्विक दक्खन दी अर्थबवस्थाएं दी महत्वपूर्ण चुनौतिएं उप्पर चर्चा करगंन। सम्मेलन च दुनिया दे बक्ख-बक्ख हिस्से गिमां माहिर हिससा लैगन। सम्मेलन दा आयोजन वित्त मंत्रालय ते आर्थिक विकास संस्थान करा'रदा ऐ।

<><><><><><>

Haryana Elections

हरियाणा च विधानसभा चुनां लेई कल होने आले मतदान दियां सब्बै तैआरियां पूरी करी लैती गेदियां न। मतदान बडलै 7 बजे शा संजा 6 बजे तगर होग। 90 मैबरी विधानसभा चुनां च 1 जहार 31 मेदवार मैदान च न जिंदे च 930 मर्द ते 101 महिला शामिल न। हरियाणा दे मुख् चुनां अधिकारी पंकज अग्रवाल होरें दस्सेआ जे इंदे च 464 आजाद मेदवार न। राज्य च 2 करोड़ 3 लक्ख 54 जहार शा मते मतदाता न। चुनां गी बवस्थित ढंगै सिर करोआने लेई कुल 20 जहार 632 मतदान केन्द्र बनाए गेदे न।

<><><><><><>

Amit Shah

केन्द्री गृहमंत्री अमित शाह होर अज्ज गांधी नगर च गांधी नगर निगम दिएं बक्ख-बक्ख परियोजनाएं दी शुरूआत करगंन। शाह होर गांधी नगर दे मानसा कस्बे च 421 बिस्तरें दी

सहूलत आले इक अस्पताल दा नीह पत्थर बी रक्खगंन। गृहमंत्री होर बउलै ट्रस्ट आस्सेआ चलाए जा'रदे इक असपताल दा उद्घाटन करगंन ते लोकें दे किट्ठ गी संबोधत करगंन।

<><><><><><>

India-Nepal Bangladesh

भारत, नेपाल ते बंग्लादेश नै भारत दे पॉवर ग्रिड दे राएं नेपाल थमां बंग्लादेश गी 40 मैगावाट बिजली-निर्यात करने लेई इक त्रै-पक्खी समझौते पर दस्तखत कीते न। काठमांडु च कल होए दे इस समझौते कन्नै नेपाल थमां पेहली बारी बंग्लादेश गी बिजली बेची जाग। एहदे शा पैहले नेपाल छड़ी भारत गी गै बिजली बेचदा हा। समझौते मूजब बंग्लादेश हुन नेपाल थमां 40 मैगावाट बिजली खरीदोग। नेपाल दी बिजली भारती इलाकें च ट्रांसमिशन आले बुनियादी ढांचे दे राएं बंग्लादेश पुज्जोग। इस करियै इस समझौते च भारत गी शामिल ऐ। इस समझौते कन्नै मेद ऐ जे नेपाल दे बिजली प्राधिकरण गी तकरीबन 330 करोड़ रपे दी औंदन हासल होग।

<><><><><><>

Jaishankar

विदेश मंत्री डॉ. एस.जयशंकर होर अज्ज श्रीलंका दी यात्रा उप्पर रौंहगन। इस दरान ओह श्रीलंका दे प्रमुख लीडरें कन्नै मलाटी करगंन। विदेश मंत्रालय नै गलाया ऐ जे भारत गी "गोआंढी-पैहले" नीति ते सागर दृष्टिकोण गी ध्यान च रखदे होई एह यात्रा आपसी हित लेई लम्मी अवधि आली सांझेदारी गी होर मजबूत करने लेई दवै मुखें दी वचनबद्धता गी दर्शादी ऐ।

<><><><><><>

Cricket

आईसीसी महिला टी-20 विश्वकप च अज्ज भारत दा मकाबला न्यूजीलैंड कन्नै होग। हरमनप्रीत कौर दी अगुवाई आली भारतीय टीम अज्ज संजा दुबई च न्यूजीलैंड दे खिलाफ अपने अभियान दी शुरुआत करोग। तोआई अज्ज दपैहरी होने आले मैच च वेस्टइंडीज दा मकाबला दक्खन अफ्रीका दी टीम कन्नै होग।



PM-RKVY

केन्द्री मंत्रिमंडल नै टिकाऊ कृषि गी बढ़ावा देने लेई प्रधानमंत्री राश्ट्रीय कृषि विकास योजना ते खाद्य सुरक्षा च आत्म निर्भरता लेई कृषोन्नति योजना गी मजूरी दित्ती ऐ। केन्द्री सूचना ते प्रसारण मंत्री अश्विनी वैष्णव होरें कल नमीं दिल्ली च गलाया जे मंत्रिमंडल दी बैठक च लैते गोदे एह फ़ैसले करसानें दी औंदन बधाने ते मध्यम वर्ग दे लोकें लेई खाद्य सुरक्षा गी जकीनी बनाने च कारगर साबत होंगन। सरकार नै 10 ज्हार 103 करोड़ रपे दे खर्चे कन्ने ब'रे 2024–25 शा 2030–31 तगर लेई राश्ट्रीय खाद्य तेल तिलहन मिशन गी बी मजूरी दित्ती ऐ। एह फ़ैसला अगले 7एं ब'रें च भारत गी तिलहन उत्पादन च आत्म निर्भर बनाने दे उद्देश्य कन्ने कीता गोआ ऐ।

